

A CHEI CHE NO ÀN ANCJEMÒ CAPÎT

Veramentri nus pareve di vê clarît avonde il nestri pinsîr su la cuistion de Regjon Julie, ma o vin sinpri l'inpression che il furlan al sedi une lenghe une vôre dure di capî, in sornade di vuè. Viodìn s'ò podìn fâsi intindi cheste volte.

Noâtris o sin furlans fin te medole dai vues e o considerìn il Friûl, de Livence al Timâf, come une regjon che sta par sè, che à cundizions gjeografichis, economichis speciâls, lenghe, tradizions e çocje etnografiche avonde diferent di ogni âtre regjon taliane e no taliane, e che à interes particulârs di difindi.

O sin persuadûz che l'idèe unitarie, la pulitiche tributarie praticade di Rome dal 1866 in ca, e l'invasion di int foreste, favoride cu la scuse da l'unificazion nazionâl, e vebin puartât une vôre di malans al Friûl, e prime di dut la necessitât da l'emigrazion che prime dal '66 no si jere mai fate sintî cuasi nuje.

E par chestis resons o sin persuadûz ch'al sedi il moment di domandâ e di pratindi l'autonomie plui largje pussibil, par che la Patrie dal Friûl e puedi svilupâ dutis lis sôs risorsis e salvâ i siei interes senza inberdeamenz burocratics, senza ostruzionisins, senza ritarz e senza sfrutamenz.

Triest e l'Istrie no fasin part dal Friûl e quindi e restin fûr de nestre visuâl autonomistiche, come Vignesie come Florence e come Palermo. Chest nol ûl dî che nô o vebin gust che vadin a finile mâl, parceche o savìn che là a vivin tanc' talians e ancje furlans. Ma o sìn persuadûz che - magari cussì no! - il lôr distin nol dipent di nô, ne des nestris cjararis ne des nestris adesions.

L'autonomie ch'ò smicjn e restares, come che la storie e la gjeografie e domandin, tal cuadri da l'Italie e magari sot di une garanzie internazionâl, par vie che si cjatìn sui cunfins di âtris nazions e che, in sornade di vuè, i tratâz e son blecs di cjarte.

I partîz pulitics talians, come che son inplantâz vuè, no puedin cundividi chest ideâl, parceche àn il lôr centro fûr di ca, e par cheste reson nô si proclamìn indipendenz, no siarvìn nessun partît; no fasin nancje vuere a nessun in particolâr, ma a invidìn i furlans a cjatâ une forme di intese parsore dai partîz pal ben dal Friûl, sigûrs che, se no si sconponìn noâtris pe nestre tiare, nissun mai no si sconponarà.

(Patrie dal Friûl – 4/4/1946)